

TARIKH : 22 NOVEMBER 2022
AKHBAR : BERITA HARIAN
MUKA SURAT : 30

APEC perlu gigih capai pertumbuhan ekonomi

APEC perlu gigih capai pertumbuhan ekonomi

Bangkok: Pemimpin Kerjasama Ekonomi Asia Pasifik (APEC) berikrar untuk mempergiatkan lagi usaha ke arah pemulihan ekonomi yang inklusif, pasca pandemik.

Kementerian Perdagangan Antarabangsa dan Industri (MITI) dalam kenyataan berkata, Mesyuarat Pemimpin-Pemimpin Ekonomi Asia-Pasifik (AELM) yang melabuhkan tirainya pada Sabtu di Bangkok, Thailand berakhir dengan konsensus yang ditunggu-tunggu, Deklarasi Pemimpin-Pemimpin 2022.

Ketua Setiausaha Negara, Tan Sri Mohd Zuki Ali, sebagai Wakil Khas Perdana Menteri, menerajui delegasi Malaysia ke AELM APEC ke-29 yang berlangsung dari 18 hingga 19 November lalu.

MITI berkata, deklarasi itu yang mengesahkan komitmen APEC turut menegaskan komitmennya untuk terus berusaha secara kolektif ke arah meningkatkan kesihatan dan kesejahteraan rakyat di rantau Asia Pasifik, di samping meningkatkan taraf hidup mereka.

Pendekatan tegas, responsif

"Berlandaskan Visi Putrajaya 2040 serta Pelan Tindakan Aotearoa,

pemimpin ekonomi APEC juga menekankan kepentingan untuk mencapai objektif kemampanan APEC menerusi pendekatan yang tegas, responsif dan komprehensif," katanya.

AELM 2022 dimulakan dengan sesi Pemukiman Pemimpin Ekonomi menumpukan perbincangan berhubung usaha APEC dalam mencapai pembangunan yang seimbang, mampan dan inklusif, dengan berpaksikan kepada konsep Ekonomi Bio-Circular-Green (BCG).

Mesyuarat yang bertemakan *Open. Connect. Balance.* itu dipengerusikan Perdana Menteri Thailand Jeneral Prayut Chan-ocha.

AELM, sidang kemuncak pertama kumpulan itu dalam tempoh empat tahun diadakan di Queen Sirikit National Convention Centre, di sini.

Pada 2019, Minggu Pemimpin-Pemimpin Ekonomi APEC (AELW) yang dijadualkan diadakan di Chile dibatalkan berikutan bantahan anti kerajaan di seluruh bandar di negara itu. Pada 2020, Malaysia mengadakan AELW secara maya, manakala pada 2021,



Ketua negara menghadiri majlis penyerahan tugas pada akhir Mesyuarat Pemimpin Ekonomi APEC (AELM) ke-29 pada sidang kemuncak APEC di Bangkok. (Foto AFP)

New Zealand turut mengadakan sidang kemuncak maya susulan penularan pandemik COVID-19.

Mohd Zuki mengulangi komitmen Malaysia dalam menangani isu perubahan iklim, yang juga satu daripada keutamaan di bawah Rancangan Malaysia Kedua Belas (RMK-19).

Beliau juga menzahirkan keyakinan bahawa Model Ekonomi BCG akan melengkapi usaha untuk menyuntik elemen Alam Sekitar, Sosial dan Tadbir Urus (ESG)

dalam aktiviti ekonomi, seterusnya memupuk amalan perniagaan beretika dan mampu menarik pelaburan mampan ke rantau ini.

Menurut kenyataan itu, ketika perbincangan pemimpin berhubung perdagangan dan pelaburan mampan, Malaysia menekankan keperluan untuk mengukuhkan lagi peranan APEC sebagai inkubator idea dan seterusnya menyumbang kepada pemulihan ekonomi global.

BERNAMA